

福惠全書

六

74  
6473  
16



門 74  
號 6473  
卷 16

福惠全書卷之二十九

腰站

夫于無事之時而設為有事之慮智者之所不廢也然則  
 于無事時之驛站而姑為有事時之籌策抑又立法者所  
 宜計置之千萬年而不用可也何也為驛遞計者凡遇軍  
 書笏午差使繁多則馬力易勞再兼安塘偵報晝夜計行  
 五百里每州縣驛站多者百餘里少亦七八十里不過時  
 移卽至縱所設馬多更番不息安有不疲殘倒斃者乎卽  
 云購補惟勤支銷有限在處需馬價值自昂有司方卒瘁



福惠全書 卷之二十九 郵政部

昭和十六年九月五日  
野村 聖氏 贈

在告又安有多金以資賠累乎計惟有另設腰站以節省  
 馬力之一法腰站設馬至半途即換而力可不疲馬力節  
 馬之倒斃稍少而賠累可甦則腰站之設不可不亟講也  
 法宜于本站適中之地或賃民房店宇有隙地可以弔瞭  
 馬匹之處設為腰站安置槽餵鍋口草料瞭樁等項將本  
 驛原派各夫名下喂養之馬均勻分撥所撥者亦止緊差  
 小差馱包三項之馬而已其安塘筆帖式定須緊差上馬  
 其所在將軍督撫馳報軍情亦須緊差好馬故緊差馬務  
 須多設既係緊差自無大包袱其馱馬或畧設一二足以

備不時之需其緊差馬恐騎多不足小差馬聊以備送差  
 馬夫引馬之用似亦不可少其他平常賚奏差使及散差  
 馬俱照常本驛應付至彼驛交卸惟緊差在腰站換馬其  
 送差馬夫及飯食草料銀俱係本驛馬夫支領送至彼驛  
 腰站不換送差馬夫亦不更領工料以便換馬即行不致  
 耽延片晷耳其腰站亦須另擇總理之人監看喂養休息  
 不致尅減草料並調理失宜其緊差既卸馬係跑急汗流  
 氣喘滿口涎沫冬則搭屨夏則撫抹令馬夫徐步牽行俟  
 喘稍定弔向瞭繩歇息俟其汗乾涎盡乏解神爽見草則

鼻呼呼然欲食然後先以空草喂之俟飲水後方加料飽  
 喂則病不生此設腰站以節馬力之大槩也 至于腰站  
 喂馬夫若另行僱募工食不資且以他人之馬暫為代養  
 休戚無關况又寄之生手耶夫腰站之馬既在本驛各夫  
 各下均勻抽調其馬夫亦在各槽均勻派撥彼腰站之馬  
 撥去馬夫既為眾人代養留驛之馬現在馬夫亦可為去  
 人代喂不過彼此大家照看兩處猶如一處自無不關心  
 况又有總理人為之監核自不致有喂養休息尅減失宜  
 之憂矣若今時值承平應付稀少則天下方享太平之福

驛傳咸嬉宴逸之安所謂腰站者雖置之千萬年而不講  
 可也

喂養

夫驛遞專有喂養馬夫必須積年善養馬者方為可用苟  
 或鹵莽生手希克斯役以圖冒濫工食尅減草料其于喂  
 養調理之道非茫然不識則漫弗經心幾何而不致馬之  
 疾病倒斃哉故牧馬必先擇夫夫若老成熟慣而喂養調  
 理無難矣夫以一驛論之如額馬八十四匹每夫可養八匹  
 此八馬之中官坐一匹緊差馬二匹馱包馬一匹小差馬

三匹散差馬一匹其八馬可分二槽每槽可喂四馬則二槽八馬可置一棚使一夫主之除官坐馬八匹另棚喂養去夫一名其緊差等馬七十二匹使九夫主之九夫外另募小夫四名分助各棚煮剉掃除之用則共為棚九槽十八而夫亦可畢用矣其九夫喂養各有所專無互相推諉之弊減冗役以厚其工食無妻子內顧之憂其不愈于紛而無所責成多而薄其所為贍養乎其喂養之法園人之牧馬如乳母之哺嬰兒其嬰兒之饑飽寒熱惟乳母之是調而乳母之早夜一心惟嬰兒之是寄必使其襁褓時安

乃當作專

笑嬉無恙而後乳母之職乃盡則其為園人者安可不思盡職如乳母乎然園人欲求盡職不過喂養調理之得宜使馬之無病欲求喂養調理之得宜與馬之無病不過早夜一心惟馬是寄使其水草飼飲之有時鞍勒脫卸之有候馳閑勞逸之適均寒暑風雨之應避而已矣何謂飼飲之有時凡料豆須貯淨房草須打高塚剉草煮料須設乾燥淨棚遇剉草時先將草中塵土抖去棚內地掃淨草剉僅半寸許老根不宜攪入剉完再用篩篩去草屑細灰聽用如多剉上堆每至用時再篩遇煮料時將豆篩去塵灰

福惠全書

卷之二十一

郵政部

日

碎石土塊及霉爛變色之豆料鍋洗淨注新汲甜井水或  
 河水煮之若井水及他宿水忌用宜煮透熟以鐵鏟抄翻  
 去火悶乾豆汁令豆漲手撚即爛然後以大淨席攤冷聽  
 用如急用宜以淨冷水淘過乃可草豆之中切忌灰土及  
 毛髮蛛網雞糞等物局中所住馬夫不可畜養雞鵝等禽  
 喂時須將槽內殘草撮去掃淨方入新草其坐槽之馬以  
 每日論之夜間草料喂飽至辰時將馬牽出飲水有河飲  
 河有寬大深池水清亦可飲否則用新汲甜井水惟停汗  
 濁惡及隔宿之水切不可飲早飲宜少飲是牽行百步庶

水入于腸不致停積胸胃控向晾繩閑息夏宜背陰冬宜  
 向陽盛熱則控入涼棚以迎四面之風日亭午擗上槽以  
 空草少許令嚼初夏拌以乾麩盛夏拌以水麩撒和之夏  
 天馬食麩清熱寬腸但不可多拌存剩槽中招蠅蚋易于  
 餽臭其他月止拌以料豆所謂撒和者不令過饑亦不令  
 過飽也撒和後稍停片時仍宜牽飲如前晝飲亦不可過  
 多飲畢仍控晾繩上或畧息牽向空處繫于椿上梳其鬃  
 尾創其毛片刷去其腹足泥垢可以清皮火而疏通氣血  
 令馬颯然神爽故善牧馬者一日一刷創三日一浴十日

可當刪去  
脈當作肌

一放驥夫刷創四時皆可但刷宜軟創宜鈍梳宜稀刷軟  
 不傷毛創鈍不傷膚梳稀不損鬃也盛夏創宜輕而少過  
 于重多則反生皮火而助熱有汗不宜刷創反惹風入皮  
 毛三日一浴言盛夏也春秋冬遇天暖無風亦月中間浴  
 皮毛中汗垢積汗皆宜滌去也十日一驥坐槽之馬騎少  
 臆肥使之驥而血脉通流出差之馬馳遠勞乏使之驥而  
 筋骨舒和然須于半饑未飲之先而後可驥也飽飲之後  
 恐傷腸臟抑又非宜日將西乃牽入棚以空草令嚼約斤  
 許牽飲如前但暮飲須多宜盡其意而止馬經云餒有三

芻飲有三時曰朝飲少之晝飲酌其中暮飲極之是也又  
 日夏汗冬寒皆須節飲蓋夏月不騎而有汗宜節多飲則  
 冷停汗斂易感寒而傷陰若騎而飲雖有汗仍途行用力  
 汗不為斂無傷也至冬寒馬在騎飲須節若閒在棚則晝  
 飲可已此即酌其中之謂也每馬日約食料豆四小升草  
 十五斤午間撒和草不過三斤豆不過一升餘皆晚喂每  
 晚點燈時上料至更盡時添草料而人始睡半夜又須起  
 添至五更昧爽又起將草料添完每有馬夫偷懶貪眠至  
 睡時將草料滿傾槽內以省半夜之起夫馬皆貪料注四

福惠全書  
 卷之二十九  
 郵政部

馬○吻○于○一○槽○之○中○東○掀○西○掀○而○草○半○歸○地○上○其○入○于○馬○腹○者○幾○何○哉○故○馬○夫○察○其○懶○惰○貪○眠○酣○酒○佚○事○者○黜○之○其○庶○幾○乎○若○差○回○之○馬○必○令○汗○乾○喘○定○日○涎○既○盡○乏○回○神○爽○方○可○上○槽○先○以○空○草○少○許○令○嚼○再○添○少○許○嚼○完○捧○去○飲○水○飲○畢○方○可○入○料○喂○之○如○本○槽○知○輪○到○某○馬○出○差○若○係○緊○差○多○時○不○拘○時○候○差○到○即○行○宜○將○輪○到○緊○差○之○馬○另○用○細○草○爛○料○不○時○飼○秣○但○頻○喂○頻○添○不○可○滿○槽○令○飽○亦○不○可○令○枵○腹○而○馳○飽○則○急○馳○必○致○努○傷○饑○則○奔○走○無○力○多○受○鞭○箠○而○防○失○蹶○若○係○輪○到○賚○奏○小○差○亦○須○早○喂○至○五○更○便○弔○起○使○草

料○在○腸○胃○稍○轉○天○明○然○後○登○程○如○遇○忠○厚○員○承○登○鞍○緩○行○數○里○俟○馬○拋○糞○之○後○乃○馳○至○中○途○馬○渴○飲○水○恐○其○搶○水○急○飲○必○纒○飲○須○數○提○其○勒○而○後○令○飲○搶○水○則○噎○搶○料○則○結○故○凡○餓○馬○初○拌○料○宜○少○而○勻○不○可○令○搶○純○料○入○口○也○飲○水○之○後○不○可○急○馳○俟○緩○行○百○步○水○入○小○腸○庶○無○水○結○之○病○及○差○到○更○換○之○處○既○卸○長○鞍○暑○天○以○手○摩○背○數○四○捧○至○陰○涼○歇○息○俟○身○汗○乾○口○涎○淨○勞○乏○醒○方○可○如○法○飼○秣○凡○料○豆○不○可○煮○生○生○則○食○之○不○化○不○可○熱○喂○熱○食○則○撒○稀○寒○天○凍○料○不○可○食○令○腹○痛○成○病○宜○置○暖○房○或○入○草○中○熱○天○餒○料○不○可○喂



此當作是

餒漿不可飲馬口淡嘗嚙墻壁間土以其有鹽而鹹也每  
 以鹽化水飲之不可多多則損腰腹以成腎冷糯稻草不  
 可食令馬冷腎敗元傷脾損膽惟南方之秬稻草與北方  
 之穀草有益于馬可長食司牧者與總理人獸醫每早將  
 棚中徧視馬溺清而糞潤則無病矣若溺白如水則傷水  
 宜節其飲糞溼則傷冷糞燥則傷熱因其寒熱而調劑之  
 所謂水草飼飲之有時者此也何謂鞍勒脫卸之有候凡  
 走熱之馬不可解鞍方下馬時宜將肚帶解鬆左手前插  
 入鞍鞵右手後持鞍未方就其背而左右輕搖之騎時再

此當作是

緊肚帶若至歇處仍搖鞍如前再將扳胸及後鞵搭起令  
 馬汗毛鬆爽馬從遠來雖經久歇于喂時不可便卸嚼銜  
 必以空草令嚼俟飲後拌料乃可去銜諺云夏不打嚼冬  
 不揭鞍夏月天熱恐馬饑渴急搶水草留其銜以節制之  
 冬月風寒恐去鞍冒風緩其揭以護蔽之若伏暑之鞍又  
 宜急卸長途酷熱得卸鞍一納其涼馬之煩溽頓解諺又  
 云夏月解鞍如救火但不宜令受簷風耳所謂鞍勒脫卸  
 之有候者此也何謂馳閒勞逸之適均夫馬道路奔驟固  
 多勞傷而久閒不騎亦易成病未免臆肥料盛水艸不消

福惠全書

卷之二十一 郵政部

七

脉當作脈

脉當作脈

此當作是

豆毒攻發，因濕傷脾，立疲損足，故勞者間之所以養其筋骨間者，乘之所以和其血脉，但久間不宜輒勞，當由漸而致遠，久勞又不宜久間，當就近而常騎，恐輒勞而筋骨未舒，則易之久間，則血脉愈滯而不行，故馬經云：一日行二日，驅三日，驟四日，馳五日，犇終而復始，千里無病，非乘之有漸而閒，不宜久乎？所謂馳閒勞逸適均者，此也。又何謂寒暑風雨之應避？夫馬之畏寒為最，畏暑次之，何也？寒則四時易受暑，則惟盛夏耳。若盛夏，拴入涼棚，遇疾風暴雨，即宜收歸暖棚，亦不可令在羶飄霖，浸灑肌膚，其簷風者

賊風也，無論寒暑勞逸，馬皆忌之，斷不可拴之簷下，以其風侵入皮毛，受病而不覺，猶賊之潛入人室竊物而不知，是以比之為賊也。凡嚴冬不可立于雪地，野放不可久置霖雨中，三春咬青，遇暄即收于棚，陽氣稍盛，則毒草生郊，惡蟲栖葉，蛛絲凝露，馬悞嚙之而病作矣。即棚間有漏，不可滴于馬身，墻隙有風，不可射及馬脊，每日辰刻，搯馬就涼，宜將槽下糞溺掃除，潔淨，溺坑時為墊，平剗草，不用老根及篩下草屑鋪墊，槽下滲濕而軟，馬立不傷，蹄局中糞穢俱宜遠徙，不可堆積，臭氣薰蒸，馬亦生病，乾糞曬燥，撲

乃當作即

碎惟向厦内遇馬欲放驥無軟土之地將糞屑鋪地令驥  
 甚佳且可代薪煮料但須牧夫好勤耳此又非寒暑風雨  
 應避之謂乎司牧者惟在盡心乎數者而喂養調理之宜  
 無他道矣又何患乎馬之為病哉○夫草豆乃所必需于  
 秋收時其價稍賤宜預為收買以備一年之需計馬每日  
 所食之數共該草豆若干寧使稍為餘溢但小民間知官  
 買恐抑值勒秤裹足不前若差役買之各鄉彼必借端騷  
 擾宜面諭鄉地里耆定期某日率領該鄉賣草豆之人擔  
 荷到縣本官著總理兵書等眼同過秤過斛不許增斤淋

尖照依時價現銀當鄉地等即各散給每有鄉民交草收  
 草人役需索使費稍拂其意大秤加收甚至留難守候竟  
 有棄草而去者本官不察以小民怨贖飽左右之貪囊所  
 損多矣該局兵書所領草豆按數具狀存案仍令總理干  
 局門過數不得偷匿短少草令善打塚者堆至草場苦益  
 周密勿令頂心漏水以致霉爛豆令圍之屋內門加封鎖  
 草豆每月五日一放各棚馬夫支領總理兵書不時察看  
 如有尅減草料致馬疲瘦者立稟重究其草料每次支放  
 兵書仍立簿登記其支數須與入數相符如有短少即係

以終之以當  
作而

馬夫偷竊查出併原領兵書重責均賠以懲覺察不嚴之  
咎至于有病之馬宜令易地另槽醫治調理不得與眾馬  
同棚易于傳染若老病殘傷之馬縱令養好不堪供差如  
曾效力有年飼以中芻以終天年其他宜即變價或縱之  
野外遇食藥草間有獲瘥者此亦節省草料之一端也夫  
善為計者與其抑價取民以斂怨寧嚴冒濫于局以節用  
又非以少為多以省為增之道乎○夫官坐必于另棚餵  
養者不惟德力宜居異等須防驛卒混應諸差每有員承  
知局有好馬而應之庸騎非臨局橫加勒索則驛夫痛受

曰當作云

鞭笞以致欲博歡心則必重損良驥故須飼之別棚以避  
小差之見辱凡馬品貴必驕非如駕劣之諸能稍耐故料  
必熟爛草必剉細如麥汰其粗節使馬食之易肥經日善  
芻者是也如閑久本官出入乘坐或令馬夫鞴鞍遊行數  
里如三日一浴十日一驟諸法以舒通其氣血若久立槽  
間不惟肥病漸作亦遲鈍坐廢矣故物有不用而朽蠹因  
之者此類是也勞逸適均之說蓋烏可忽諸

選獸醫

馬之有病全賴獸醫看治夫病雖作于一時而受病在于

平日故善醫者當預察夫受病之先而不治乎既病之後  
 夫及其病作而始治之則所受日深而所發愈遲發遲者  
 其病大而勢危不可治矣諺云馬有轉輻之厄言乎受病  
 甚易而救治宜早也馬之病甚多見之身形者有七十二  
 症見之瘡毒者有三十六瘡黃五疔十毒見之腹臟者有  
 十結見之目者有骨眼渾睛見之蹄頭者有十六般痛見  
 之卒死者有五絕之不同大要皆水穀寒熱之失宜受之  
 臟腑而發之病症故經有八症八邪之論言馬體有寒熱  
 虛實之殊而適值其饑飽勞逸之過此其所以受病也故

古之之當  
 作昔

馬有五經之疾而五應適徵之五經者心肝脾肺腎也五  
 應者眼耳口鼻舌也心有疾舌則應之紅如硃砂是也肝  
 有疾目則應之眼不見物是也脾有疾口則應之寒唇似  
 笑是也肺有疾鼻則應之下流膿涕是也腎有疾腎則應  
 之垂縷不收是也夫善醫者視外之所失而即知內之所  
 感察外之所形而即知內之所受惟因其失而預調之使  
 不致于病著而難治則古之師皇伯樂之為療不過如是  
 耳然則欲知馬疾之有無亦可由外而得其狀矣夫有疾  
 之馬精神倦怠耳拾頭低毛焦廉弔料草遲細是也無疾

究下當有於

脉當作脈

之馬精神倍爽料草增進皮毛光澤呼吸勻靜四肢輕健  
 糞溺潤清是也審其狀之有病而急為療之猶未為晚也  
 雖然病有受之臟腑者有受之經絡者有受之筋骨發之  
 皮膚者則又有為針為烙為割為取為敷洗之不一若僅  
 以煎劑而灌飲之則參芪之所不達亦將束手而聽命乎  
 每見局中獸醫不究心安驥通元諸書王良造父集說不  
 諳脉理不識病源但記口傳幾色湯頭眼前幾種症候便  
 自號曰獸醫至于針烙割取之方茫然弗省夫庸獸醫之  
 悞驥與世庸醫之殺人亦何異哉故欲置驛必先訪良獸  
 醫

醫獸醫良而馬獲更生馬更生而金錢可省若馬貴之區  
 活一馬便省金錢數十貫一年之中凡驛之倒斃何止數  
 十能活其半便可省錢數百千矣則獸醫之所係豈其微  
 哉諺云重賞之下必有勇夫為有司者誠能厚其廩餼而  
 招至之則師皇西至伯樂東來又何患獸之果無良醫乎  
 得其良而黜其庸凡馬之疾痛疴癢皆醫是任每清晨務  
 周視各棚視其糞溺察其形狀觀其肥瘠少有失節則速  
 為治之遇危疾則具呈馳報敘明病由及何症可否醫治  
 愈則記功彙敘斃則視其所犯而責究廝養之人病屬可

生而療之不効本醫記過奪餼至于所應用藥料及針烙  
 割取之具預爲蓄備令兵書具呈親領陸續給于本醫支  
 發用過各登其籍每歲終兵書與本醫稽覈兵書分造管  
 收除在並花撒細數報銷冊送官官照原領磨對如支發  
 數少責在兵書用過數少責在本醫按數賠補如此廝養  
 自是經心本醫亦勤療治馬無倒斃而金錢可省藥具無  
 缺而破冒有稽驛務之振興思過半矣孰爲治法之不本  
 于治人乎

查倒斃

凡馬之倒斃在局者係何馬夫所養該馬夫具呈報官呈  
 內敘明某月日領到在棚某毛色馬于某日得何病醫治  
 不瘥于某日在局倒斃取有耳級呈驗其皮張現存在局  
 聽候變賣中間並無扶捏情弊理合呈報于年月日下開  
 列馬夫獸醫兵書姓名花押本官批准存案掛內號發房  
 粘卷出差在途倒斃者該送差馬夫具呈敘明某日據馬  
 牌某撥某棚某馬夫于某月日領到喂養某毛色馬于某  
 日送某差乘坐行至某處係某病作于某處倒斃取有耳  
 級皮張呈驗中間並無假捏理合呈報如係卸差回空倒

斃亦照前開明病症及某處倒斃緣由恐送差馬夫留戀  
 卸差之處賭博貪眠酒醉遲限因而跑急病作倒斃或回  
 途貪利稍帶行客及裝馱行李以致勞乏病作倒斃俱未  
 可定如有同差馬夫須令同差馬夫出具並無以上等情  
 及扶同虛捏甘結于月日下開列撥差馬牌同差馬夫姓  
 名花押本官批准存案掛內號發房粘卷其皮張發該驛  
 兵書收領變價領狀附卷如在途倒斃無同差馬夫具結  
 須差老成內丁同妥役前往密查如果係某處倒斃必有  
 馬骸骨現存如係本役跑急馱客致斃道路豈無見聞更

有奸惡馬夫私賣馬肉詐言倒斃止帶皮張報驗者查實  
 定拿重責枷示仍查倒斃之馬曾否舊有勞傷如非勞傷  
 且有乘跑馱客宰賣情弊除枷責外仍罰賠償庶可懲一  
 儆百凡驛中額馬該管上司或每季或年終票查馬匹有  
 無缺額有無倒斃例開馬匹毛色齒冊申覆如有倒斃即  
 照毛色購補不惟本棚應差不宜有缺恐上司不時按查  
 與所造報毛齒不對借端勒索但倒斃不宜多報報則必  
 解皮張變價銀兩且多報則必有曠額之補解買補之申  
 明反滋多事如係額外自備之馬倒斃該馬夫雖照式呈



報宜另立卷案存宅備查及皮張另發變賣如歲終造報  
 驛遞奏銷將本年發房倒斃報呈卷案送宅細查除造報  
 倒斃馬匹其皮張自應變價申解者倒斃原報呈仍行發  
 房其不造報原呈不必發房扣留宅內可也

逐娼妓

凡郵騎接遞之所必孔道鎮集之區每有無恥棍豪多置  
 狎邪門巷遂作鴛巢燕壘頓成柳市花街凡其驛使停驂  
 勢必訪尋賣笑于是花迷蝶戀醉擁柔鄉宛似山中閒  
 日高三丈而猶眠因之夢醒心驚星馳華隰儼然峽裡輕

舟片刻一瀉而千里縱是迅全掣電難辭竭蹶之虞總然  
 力號越峯莫保虺噴之患實因野艷以招蜂遂令狂且而  
 損驥宜即嚴行驅逐務須掃蕪以無遺倘仍暗地潛藏定  
 必連株而重究但可保全駭北寧教怨恨琵琶

勤親察

驛中總理之人雖云親信可托但恐日久情熟不無狗庇  
 之處本官宜示以莫測不時猝臨其局察其兵書馬牌夫  
 等有無擅離各棚所劑之草所煮之料按日餉秣之數有  
 無尅減有無生硬灰土毛髮槽間局地有無掃除潔淨瞭

椿弔繩有無○整備貯豆之房有無○封鎖開視其囤堆草之  
 場有無○局閉入視其塚約畧有無○短少暖凉棚廠有無○類  
 壞馬匹有無○羸瘦傷殘在棚之馬與出差之馬檢勘差簿  
 有無○合數缺少如有前項諸弊定將本經管查究重治至  
 于書牌夫役有真正實心任事勤勞盡職從無過犯者宜  
 從優獎賞如此則懲一人而衆皆知儆賞一人而衆皆知  
 勸有不畏服本官之神明而龜勉自效者乎

船夫車驢

向者軍興之際兵馬徵調凡水路經過地方所需船隻在

在封拿無論商賈阻羈行旅斷絕卽漁舟釣艇靡不搜羅  
 更有州縣奸差受賄賣放因之爲利卦捉既無定數騷擾  
 亦無寧晷甚至集候多時舟工凍餓遂有縱火焚船而星  
 遁者以故各省大吏具疏請造官船以資應付稍有不足  
 所需無幾又定有按船坐人之限不致如前追索之無已  
 也至于拉船緯夫上司行文州縣僱募刻難遲緩四鄉按  
 烟撥派夫丁與津市所僱游乞嚴行差押或閉之空舍禁  
 之廟宇以候大兵之至然而飯食不充晝夜凍餒臭穢薰  
 蒸多成疾疫雖有慈憫之仁侯莫敢輕議乎疎縱鴻聞之

今南昌郡承謝公諱錫袞者向在河屬之靜海令時值滇  
 黔勘定禁旅凱旋調集絳夫雲集城邑公素知禁閉之苦  
 乃與羣民約悉縱之歸俟至期間呼即至遂十夫以一夫  
 為長統之命鄉地押回逾月凱旋兵至衆夫果畢集無一  
 逃者以故舟師魚貫而進地方安堵無譁雖公之經畫有  
 術亦平日之誠信感乎民自不忍欺耳嗚呼夫天下有司  
 必得如公誠信素孚于民而後可以言縱否則一去而未  
 必如期而至大兵屯集呼擾官民不大受其害耶若夫師  
 行陸路搬運糧芻馱載甲械南方俱用人夫北方多用車

驢人夫有錢尙堪僱覓車驢無具何以供應每見有司差  
 票四出一任催拘而全無變通以致胥役作弊差貧賣富  
 無車驢者反得折乾而不問有車驢者因之叠累而難辭  
 遂致民間折輪斷蹄以避重害設後有繼至豈能神輸而  
 鬼運乎幸今天下太平無事四海又安船夫車驢無復有  
 從前之紛集矣所供應者不過來往散差與餉解犯耳  
 其船隻責令埠牙將應當差之船預先均派輪流應付差  
 至即行毋得臨時耽延推諉應官動站項給值者著埠頭  
 同船戶當堂具呈親領毋得短少致累貧民其小差絳夫

例係沿途地方撥換本官宜預先出示飭令該地方照舖  
 店烟戶從公酌派差到即行接替如係下水例不給繹夫  
 其車輛驢頭需用多者例有部行或前途督無預咨知會  
 州縣官須照四鄉烟戶著令莊頭鄉地除紳衿本戶優免  
 外其餘盡行派出視所用車驢之多寡以定所派烟戶之  
 多寡少則或百家派一車二十五家出一驢多或五十家  
 出一車十家出一驢又視所送程途之遠近以定僱募價  
 值之多寡如有車驢之家認出車驢抵其本戶應出之值  
 無車驢之家照本戶所派之值以幫貼之如有存剩車驢

俟有後差照派供應完日週而復始永為定例應動正項  
 開銷者本境居民車驢約地盡行開報鎮集攬載車驢該  
 牙行盡行開報本官親身點驗堪用者即令約地牙行各  
 出現在甘結本車驢夫照依僱募時價具領如數給發批  
 領過硃存案以備報銷若餉藉及遞解人犯經過所需有  
 限例係沿途舖店供送稍多則沿途烟戶協濟仍飭該鄉  
 地將舖店若干家派車驢若干烟戶若干家派車驢若干  
 先儘舖店用完然後續用烟戶必舖店輪差二次烟戶方  
 輪一次以舖店皆係雜民營運尙有生息而烟戶則俱困

處窮黎未堪多累也夫凡事豫則臨時無擾凡事均則苦  
 樂無偏是在上之相時因地殫心經畫而已至于胥役借  
 端需索俾供應之民累中加累此蠹賊之類也合亟剪除  
 之以植嘉穀可耳

稽查徒犯

凡著驛徒犯其人不一有因盜賊而未減者有因命案而  
 從擬者有官吏豪棍犯贓而發配者上司差押連文解到  
 本州縣具收管併著驛月日申覆隨差役票行該驛取著  
 驛收管回報發房存案如其人情罪可惡相貌凶戾宜照

假當作暇

例帶錄令作工役在驛宿歇不許擅離早晚勤加查點恐  
 其脫逃回籍猶可關提若竄遠方仍為非法不累及該驛  
 乎如吏役有識字及能事者令其書寫登記相幫料理驛  
 務量給工食以恤其勞若係豪棍必平日所行無忌上司  
 訪拿發配示懲其人自有身家猶必索相識書函為之先  
 容囑託至于曾經出仕名列衣冠雖法令之宜加亦大體  
 之當恤倘其遠在他鄉行李蕭索更須畧為資助免淪凍  
 餒但二者未便拘以常例仍宜密諭管驛書牌本處鄉地  
 及所居鄰佑早晚潛為稽察毋致私離配所如具呈請假

歸里省親名色無批准令回之例或哀懇情切必得有身  
家的保具結定限回銷方可准允否則放歸致生事端該  
管官難辭疎縱之咎若其年限已滿本犯具呈本州縣具  
文申覆原發衙門併關解原籍取收管存案仍查本州縣  
舊例而行夫其徒限已滿即為無罪之人及其將返也無  
論仕流宜加優禮設飲餽費以前其恥辱即豪強之輩素  
修體面者亦宜別示周旋贈勞撫慰以生其感悅此豈要  
譽于若輩哉實君子忠厚存心之應爾也  
福惠全書卷之二十九終

福惠全書卷之三十  
庶政部

總論

夫文之夫當  
作彼

夫州縣司牧一方其地方之利弊政事之張弛與夫文飾  
觀瞻愛惜生命罔論巨細纖悉皆當留意經營一利興地  
方便受一事之福一務舉政理便見一端之績若其期會  
簿書勤勞鞅掌遂謂吾事已畢此外無關考成不復置念  
辟之繕室者廳事階除為賓客接見之地勤施丹雘鬆采  
以博華美之觀而私寢燕閒之居庖湍牲牢之舍任其畝

傾滲漏而不之恤一旦樑摧壁壓主僕受傷牛羊遭殞其  
 爲廳事階除之美豈能獨存而更邀賓客之一顧乎故勤  
 其大者不可忽其小全乎已者尤必及乎物苟惟大之克  
 勤而小或弗慮已之是究而物不爲圖夫事有因其小而  
 適以害其大所謂一星之火可以燎原仁有及乎物而正  
 以修乎已所謂一念之善可以格天爲政者于大小已物  
 之間所當兼務以求福利乎民毋致如繕室者之有待于  
 摧壓可也至于爲績爲善豈所敢自計乎 鴻 今于庶務畧  
 舉十餘條皆其利弊張弛觀瞻生命所當留意者由是類

推之又在 賢侯敷治勤民無已之盛心爾

條陳興革

夫新官到任條陳地方利弊一以除從前之積累建本任  
 之新圖又有上司下車之始咨訪各屬之所宜興革者條  
 晰具詳冀以知閭閻之休戚卽其建白亦以覘本官之才  
 識然事有宜于此而不宜于彼者有宜于今而不宜于後  
 者蓋必絜一事之始終久近而深思遠慮罔弗攸宜又必  
 訪求最確合紳衿百姓之議而衆見僉同然後爲興爲革  
 雖或他有所不便陰相阻撓亦毅然行之而不顧何者利

爲千萬人之所共而不便乃一二人之所獨也故小則可  
 以自行大則請之大吏或以仰副上官之清問所謂興一  
 事而利及無窮永無後患而初始者之心乃可大慰也苟  
 或不然自矜一己之能喜爲獨出之見未暇詳求輕舉妄  
 動及其事已更張民之受累反深勢將扞格難行然後悔  
 之靡及不徒滋擾怨乎故與其興事而無益毋寧省事而  
 民安何者見在之害民相安于故常其害猶爲有底方新  
 之害民共駭于創行其害將更無窮也昔宋慶曆間以元  
 昊犯邊官軍不利籍陝西之民以爲鄉弓手使守護鄉里

原爲地方防禦計耳未幾而盡刺戍邊陝民苦累滋甚已  
 不堪言後韓魏公建議于陝西義勇三丁刺一可益兵二  
 十萬以震讐亮祚使不敢內侵亦不過一時權宜計也且  
 請降勅榜與民約永不克戍而司馬光爭之不得魏公以  
 爲已在夫何憂詔言之不信後不十年而沿邊運餉率以  
 爲常矣王安石請以常平錢數十萬作青苗錢貸之民間  
 倣周官國服之制以收民二分之息民得錢以助耕農官  
 得息以資邊餉未爲法之非善也不知始以情願而旣以  
 抑配冒費無償而迫于催呼鬻產賣妻殆無虛日夫韓魏

庶政部



公有宋名臣王安石一朝學者豈忍有心以累民哉蓋見其始未及慮其終矜乎獨未肯謀于衆耳宰相謀國之不臧禍流天下司牧謀政之不臧禍瀰州邑可不慎乎即以近時州縣之公事言之鴻任鄉時上官奉部文查報開墾荒田議敘加級卽陞鴻思鄉民屢遭水旱流亡及地震壓死人丁之苦間有新墾乃復業窮民以資糊口而遽卽陞科里社多端派擾則哀澤之鴻又將飄羽而去矣于是不忍奪百姓之瞻養博一己之功名乃其文申報云鄉地負山瀕河旱澇頻臻昔日老荒瀰漫砂磧已不可耕近日逃

亡之荒鞠爲茂草賦多賠累方今現在招徠俟有主一經復業無主情願開墾者卽行申報照例起科鄉民間之不足勝感悅以爲父母不重功名而愛養我民也未幾忽發投誠官兵于荒田多處令其安插開墾部議山東于沂費鄉等處上行一至鄉民震駭無措將來占熟棄荒爭闕無已鴻乃具詳歷陳其不便且荒田多砂磧不可墾就田益造室廬無地兩議居其一大中丞以爲然遂允詳而止分撥沂費民乃免于騷擾夫鴻向者具申報現在招徠開墾非盡無主之荒也所云砂磧難耕非皆可種之土也正若爲今

福惠金書 卷之三十一 庶政部

日投誠不可安插地耳然後知為地方措意貴在虛圓而  
 可復為上司申文貴在前後相關若止顧敷陳痛切一味  
 說煞使後之難以轉移是未見立言之善而思慮之周也  
 若鴻前此所覆但云百姓流亡無人開墾則安插投誠正  
 其宜耳雖復極力斡旋又安能動上官之聽耶夫查報一  
 事猶須前後始終顧慮如此況夫興革之大豈可輕議而  
 不加審處乎更以近時之私例言之每見州縣新例自勵  
 務博聲譽以見重上司錢糧羨耗衙門一切舊規盡皆裁  
 革百姓未始不稱廉父母矣迨乎上官餽送賓客應酬以

及妻子之饗殮幕友之修俸意外之補苴交相告急設措  
 無從于是昔之所裁革者而漸次施行乃紳衿士庶羣然  
 怨謫交騰以為父母之侵削我民也不知今之所復即向  
 之所裁有何增益于其間哉然而民既安于所裁矣忽然  
 而復之則其所復者非即同今之所創乎欲民之不為怨  
 謫不可得也故老于吏事者微獨關於地方之事未可輕  
 議興革而官長平昔養廉之具亦未宜一槩蠲除也然則  
 地方利弊衙門舊規將聽之而不問耶曰非也害去其太  
 甚利求為可久而舊規存其可安汰其過濫而已若謂民

有弊而弗除有利而弗興與已所取而是循所濫而弗剔  
地方又安賴此尸位素餐之牧宰也哉

訪拿蠹棍

夫衙蠹地棍之敢于作奸而猖獗者必其官長庸懦而不  
能執法以懲也若夫精明之吏乃其平素有為又烏容此  
而貽害地方乎牧宰蒞任之初或因被害之告發或因百  
姓之公舉拘而訊之酌其罪之輕重以為懲處斯亦無難  
矣然而神奸積蠹巨慝豪惡其平日之權術足以牢籠才  
智平日之強橫足以恐嚇庸愚非曲為狗庇而不言則有

乃當作即

所畏憚而不敢如是而被害誰為告發百姓又誰為公舉  
哉是在官長潛為密訪慎毋輕泄托名他務而親為擒獲  
之閉之囹圄即為榜告其被害之含冤蓄恨久矣有不踴  
躍而赴控者乎研審情真供招立案列款通詳候批定擬  
雖有惡黨代為解釋多方夤緣彼初審之供證已定不得  
而動搖矣若夫奸蠹尚盤踞衙門何難立就拘執若已經  
告退彼之腹心羽翼日在官左右以為窺伺凡有舉動罔  
弗周知故欲其擒治亦必如前法庶無漏網之虞矣但衙  
役犯則本官自有失察之處分若舊任現在仕途者猶宜

酌法以無傷前後同寅之雅若罪不可宥以法治之可也  
 無庸申報或網開一面令其族屬鄉地全具公保重責枷  
 示其所詐之贓追給原主具領存案仍視公用所需如監  
 倉養濟賑貧等項罰其修葺捐助以罄乃貲財使不得有  
 所恃而復思狂騁但官切勿絲毫染指以滋人口實夫新  
 官初蒞當此積弱之餘不大有以振剔之則奸惡無所儆  
 戢而良懦愈致欺凌抑亦不得已之舉耳若夫蠹豪既經  
 懲創肅殺之後必有陽春宜訪其鄉曲之謹厚有德者優  
 其禮而獎之胥役之小心畏法勤勞素著者厚其賞而勸

之則至公無我之心有以共白于其眾又安有不憚其威  
 而感其德者哉

申飭舖遞

夫舖遞之設蓋以供送各衙門之公文者也  
 報上司之文其在衝途有彼省傳送鄰省及京部院之文  
 每晝夜須行三百里凡所到地方舖司于公文套上填明  
 某日某時到即為前送如有稽遲擦損定行查究此定例  
 也但充斯役者皆貧苦之民棲身于曠郊敗舖之中奔走  
 于雨雪風霜之下饑寒困頓已不堪言所望者些須之工

食以資衣飯而本官每視若輩為至賤之人工食為可緩之物非扣減止給其半即免欠以聽其追夫為舖司者又侵短其司兵之所有而吞肥之以故名雖掛于舖役而身多趁食他方每公文送到沉擱層累積日淹期即或倩人代送受託不終棄擲中途屢經查勘凡此皆因糊口之為謀遂致官書之是誤雖欲嚴加重懲而見此羸羸襤褸又安忍乎為司牧計者其司兵工食斷宜如數庫給不得以欠糧抵兌仍嚴飭舖司須照司兵按名足給不得侵短分毫本官或道經舖次不時呼司兵而訊之如舖司侵扣重

責追還各舖兵既獲資生不得仍行趁食擅離汛地公文一到仍將某處某人于某日時送到某衙門公文若干角某角面開內若干件俱登記號簿明白星馳前送不得仍前沉擱及僱倩他人如送到公文擦損及封口有開拆痕跡隨取本人甘結存據庶日後查究責有攸歸至于送到交割之處仍取該舖于某日時收到公文幾角收管存據庶別有稽遲棄擲與本舖無涉若後經查出係本管舖遞失誤者倍加懲處如此則司兵自不敢耽延推卸而公文亦可早為馳達矣凡緊要文書應當差妥役不可驟由舖遞以防本地奸人偷看及他處沉擱向

有縣公發出賣送撫院公文為本地憊衿私開夾入縣公  
 劣蹟款單雖撫軍知奸人所為而縣公平日之疎庸可見  
 矣卒被糾落職此皆因公文徑發該房未經舖司親領耳  
 凡每日應發某文署內按角每角按件掛號訖發該房上  
 號早堂領文時本官當堂驗明幾角某角幾件與角面數  
 對遂角實封按角交付舖司親手領去隨令分發各路舖  
 兵馳送其舖司為司兵之首領須擇老成謹慎者充之其  
 積年奸猾者革逐另募則文書逐日有所稽考而典守者  
 無所推諉自不  
 敢通同作弊矣

嚴緝私販

夫鹽徒販私皆係附近有產鹽處所奸民與場丁通同私  
 易奸民利得賤鹽場丁利其售貨其私販所至之地又必  
 有窩家而鄉村小民貪私較食官頗賤故羣相爭買而販

私者亦因其易售而覩為恒業雖州縣例有緝私捕壯而  
 私販亦例有納壯常規于是私鹽盛行而官鹽日壅然更  
 有大夥鹽徒南方撐駕大船北地多驢馱負弓刀炮火白  
 晝公行庄邨任其經過捕壯不敢稽攔其尤可怪者官商  
 納課領引到場買鹽者也如直隸天津山東濰口之商所  
 認各州縣額引在場買鹽運行州縣例有銷引考成不得  
 不督責民間買食其如本商貪圖多賣反暗買私鹽而充  
 官鹽以致鹽多難消又藉口民多食私而令官壅竟有州  
 縣徇商情面追比等于正供此北地奸商借官行私之弊

也如江淮兩浙之商例有管理上場下河等夥計其不肖  
 之徒糾合無賴買私連檣運載明插店日旗號執持官引  
 以為影射江河四達莫敢伊何又間有大膽豪商賄通官  
 長細載多舳公然行掣徑同額鹽一體裝往地頭發賣或  
 解子別售他商以取倍稱之息此南方奸商借引行私之  
 弊也然而州縣官禁小民之私販易禁大夥之私販難禁  
 北商之借官行私易禁南商之借引行私難何也欲絕小  
 民之私販必先嚴賣地之富家富家絕而私販不行私販  
 不行而民間無可買雖欲不食官鹽得乎夫私販絕而官

鹽自消無難也其絕富家宜嚴飭保正十家長逐戶挨查  
 如有固私立行拿解倘玩而不察與鄰佑知而不舉一併  
 連坐重究其拿獲私販務訊買之何所併究所賣之人私  
 販入境必有所來之地務當扼要查拿彼自難容輕涉如  
 是私鹽不禁而自絕矣至于大夥鹽徒經過地方新例  
 照盜案處分豈容入境公行然而二三捕役莫敢攪兒所  
 過鄉邨稍或拒阻非恃眾劈柵焚屋即日後行劫報仇夫  
 有才膽官長素嚴保甲須預飭保正十家長庄頭等凡探  
 有大夥鹽徒將入本境一面整備壯丁持械堵截一面飛

報本州縣親率兵壯星馳其處各村庄鳴榔放銃齊集救  
 援如鹽徒恐而他往嚴守毋令入境若已入境須大張聲  
 勢多集壯丁裝架坐砲相距箭地三面圍之毋輕與交鋒  
 彼知官衆嚴整不可犯必棄驢向空方而遁然彼遁則已  
 不必窮追將所獲驢鹽除酌量給賞外止以拿獲私鹽申  
 報院道不宜輕敘鹽徒帶械官兵追捕之語以滋駁查多  
 事也若鹽徒恃衆拒捕殺傷兵壯卽與強盜無異務須協  
 力擒拿其持械拒捕傷人等犯止以現在及被殺者爲斷  
 但要審取確實供招勿令日後游移爲妥至于脫逃餘犯

爲數無多衆鹽徒不爲供出亦可不窮究以律例內鹽  
 徒聚衆十人以上拒捕傷人雖不曾下手仍爲從論充軍  
 不得比于販私獲鹽不獲人者不追之例也夫大夥嚴行  
 堵截使聞鋒而避不入吾境上也入而圍之使棄鹽而遁  
 次也不得已而抗敵交鋒以致殺傷有所擒獲申報具  
 題斯最下也總之鹽徒經過乃欲假道他往以圖射利今  
 來者已爲虧折而後者又何苦而由斯徑耶此大夥鹽徒  
 將不禁而自阻矣其北地之商買私暗充官鹽由于引鹽  
 到境官不爲稽考也夫本州縣額引若干每引額鹽若干



合計四鄉煙戶若干。按每戶下口之數與額引鹽斤之數。而均派之分發四鄉鄉長庄頭按戶買食此其一或謂雖係官鹽聽民自買若行分發鄰干攤派本商額鹽每年或一次二次運行即將運到引鹽若干斤呈報到官本官即出示張掛本店門首將運到引鹽若干斤諭城鄉約地庄頭照烟戶于某日為始速付本商店內照時價公平買賣本商不得故昂其值酌定期于某月日買完本商每月將民間買過引鹽若干呈報州縣俟定期買完之日將本商賣鹽底簿弔查如尚未買完再行出示催令民間速買

連當作運

以便銷引而副考成否則本州縣嚴查未買人戶定以食私重究如已照數買完即令本商將運過引目送驗具文連引填明批解月日繳銷引鹽賣完之後本店又復開張或潛行私賣即係買私網利或傍人首告或本州縣查出定行申報按律究擬此又其一向來地方官每于歲終將銷引文書徑交本商自投運道而引未嘗寓目保無匿引影射私鹽者乎今引鹽按額完銷運引即行驗解商無暗賣之私民息多買之累此借官行私之弊可以杜絕矣若夫南方之商運行各省定由長江大河而去非沿途州縣

之可稽查也。其彈私之責，殆在巡、離使者之與運道乎。商人領引赴場買鹽，竈丁只照引目聽買，不許將私煎夾帶。查出本商餘鹽，併究所賣竈丁。若批驗所掣摯之後，將引即行截角于擇吉開行之後，仍有駕船插旗江河行走者，即為查拿，解究務盡根株。每年行銷舊引，尅期報繳，不得留藏本商以滋影射。夫竈丁不賣餘鹽，掣所嚴查夾帶，則私鹽不得出場，引日照例截繳，私販盡法窮究，則商人無所容好。此借引行私之弊，可以立清矣。而又何難乎。夫四者之弊，既除，官鹽無壟，額引可銷，國課亦因之而裕矣。

然貧窮游手，無以資生，聊借升斗之私，以少延性命。故律有貧難，軍民肩挑背負，易米度日者，不必禁捕之。文今緝役舍大夥而專拿此輩，有司遵功令而併究貧人，此亦徇法之太過乎。語云：律設大法，理順人情。況又律文所宥而非馱載射利者，比吾願一切置之，以昭盛世寬大之風可也。

承審 欽件

凡欽部憲件類皆命盜疑難大案，上司以某州縣為有才而特為批審，然而有情勢阻撓之嫌，有展轉逾限之罰。

有核擬駁審之煩有問失出入之處分事為他人代庖而  
答則本身自任且或會勘之奔馳適快地方之公務殊屬  
無益何必擅能莫若托故以婉辭免致勞神而受過

額外雜辦

夫雜辦者于正賦之外而因事以起者也如奉部文搬運  
採買等事雖云用過准動正項開銷然錢糧起解存留俱  
有定款難容那借若再行瀆請上司又以本官無才致生  
輕厭且限期甚迫非一手足可辦不得不委之各里分頭  
整備俟用過之後另文報銷如鴻在郊時奉部文採買砲

者也之者當  
刪去

乃當作即

車木料一事鴻即傳請紳衿于城隍祠公議先發庫銀四  
十兩令該年里長公領照來文按數均派採買運解其用  
過若干俟大部允銷即從應納大糧扣抵買完本縣出具  
批文四鄉僉議老成里者各一人赴部投交然而榆木大  
者甚少採買斷制及水脚諸費已不下百餘金及解至大  
部停閣不收書辦作官等通同作弊必須用價買彼見成  
之料而其價較本地採買昂溢數倍否則謂解來木料違  
式無用仍行駁換以遲悞軍需查叅夫彼見成之料乃各  
處採買數多浮于所用故經管諸人因之轉售分肥是則

奸書猾役于行文之始早已籌及于此也乃解木之人不  
 得不多方揭貸除售值及一切使費又不下二百餘金迨  
 年終奏銷僅准開銷七兩有奇則前後所費之三百餘金  
 將何著落乎以為派之民間民已知動項之有文以為賠  
 之有司有司廉俸之有限乃止以允銷七兩之數分發于  
 民比之所用已不啻什百倍徒而欲民之不疑官長之尅  
 扣者幾何哉于時各州縣之刁民紛紛上司具控以不肖  
 之名妄加官長夫諸如此類地方常有雖民間多費固屬  
 可矜若動令官長受謝何以居此而無媿乎鴻于開銷到

日傳集紳衿出部文相示比前發之四十金除扣抵大糧  
 尚須補庫三十餘兩但念民費實多鴻為捐俸代償庫項  
 然又慮百姓之不為彼陳情也于是復以買價多費情形  
 詳請院司懇乞題增及院司批詳既下榜示通衢夫紳衿  
 百姓亦諒父母之心殫而卒不致如他處之嘖嘖者以既  
 發現銀即前後所用皆里者經手而縣官絕未寓目也然  
 為民父母者知百姓實多窮困租稅力役已疲于水旱之  
 頻仍而意外之輸將又加之借端之苛斂奸胥猾役需索  
 誅求百姓脂膏寧有幾乎譬之子嬰痛苦為父母者方且

拊摩顧復之無已若又從而答之豈忍也哉故凡地方不  
 得已而際此飛差惟是官無染指而嚴禁里胥科擾則甦  
 民免謫其庶幾乎

申報災傷

夫地方遇有水旱蝗蝻印官即宜親查或闔境為災或偏  
 隅受害里地公呈舉報便須傳集紳耆共議凡經申報上  
 司一面據詳具題一面委員踏勘其間供應有費規禮  
 有費上房紙張造冊有費大部承行覆免有費要當計所  
 報災傷分數與應蠲錢糧分數若干較之各項使費共若

干若費少而蠲多則宜報若費多而蠲少則慎勿輕舉以  
 滋勞擾而無利于百姓宜更取里地不成災免報公呈存  
 案免致羣口反議印官之不上陳也若災宜申報立即具  
 詳查遲報災傷一月以外例有處分至于踏勘例亦上司  
 委員固無俟印官先踏勘而後申報以致遲延自貽其咎  
 也所云一月就里地具呈以及印官申報到院司之日要  
 速勘方准一月以外耳否則例有參罰印官聞災應先單騎  
 例之愆非云州縣止據呈轉申而不必踏勘也若先經申  
 報具題後勘不成災仍可據不成災題結若既成災照例  
 按分蠲免部文一到宜嚴查真荒照該圖里坵段原額錢

糧扣免毋致以熟作荒停貧免富使小民不得均沾朝  
 廷實惠是又司牧者之責也

福惠全書卷之三十一終

